

**PKPB: Kenderaan diperiksa turun kepada 194,450 - Ismail Sabri  
Astro Awani  
08 Jun 2020**

PUTRAJAYA: Menjelang satu lagi hari lagi sebelum berakhirnya Perintah Kawalan Pergerakan Bersyarat (PKPB), jumlah kenderaan yang diperiksa oleh Polis Diraja Malaysia (PDRM) menunjukkan penurunan kepada 194,450 kenderaan pada Ahad, berbanding 225,345 pada hari sebelumnya.

Menteri Kanan (Kluster Keselamatan), Datuk Seri Ismail Sabri Yaakob berkata, PDRM turut menahan 60 individu atas kesalahan ingkar PKPB termasuk 53 direman sementara tujuh lagi diberi jamin polis.

"PDRM turut mengeluarkan kompaun kepada 277 individu termasuk 30 daripada kompaun itu dikeluarkan di sekatan jalan raya," katanya pada sidang akhbar di Putrajaya di sini, pada Isnin.

"Pemeriksaan tersebut dibuat dalam 133 sekatan jalan raya rentas sempadan negeri di seluruh negara," katanya lagi.

Dalam perkembangan yang sama, Ismail berkata Task Force Operasi Pematuhan yang diketuai PDRM telah membuat 75,182 pemeriksaan pada Ahad bagi memantau dan menguatkuasa pematuhan prosedur operasi standard (SOP) PKPB.

Sementara itu, beliau berkata Kementerian Perumahan dan Kerajaan Tempatan (KPKT) telah melakukan 7,780 operasi sanitasi merangkumi 132 zon setakat Ahad.

"Semalam (Ahad) sebanyak 40 operasi sanitasi dilakukan di 30 zon membabitkan 10 negeri antaranya Sabah, 10 operasi, Johor (tujuh operasi) sementara Sarawak (enam operasi)," katanya.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/pkpb-kenderaan-diperiksa-turun-kepada-194-450-ismail-sabri-246188>